


石門文字禪

一



上海商務印書館縮印江
南圖書館藏明徑山寺本



皇圖鞏固 帝道遐昌
佛日增輝 廣輪常轉

石門文字禪序

夫自晉宋齊梁學道者爭以金屑駢眼而初祖東來
應病投劑直指人心不立文字後之承虛接響不識
藥忌者遂一切峻其垣而築文字於禪之外由是分
疆列界剖判虛空學禪者不務精義學文字者不務
了心夫義不精則心了而不光大精義而不了心則
文字終不入神故寶覺欲以無學之學朝宗百川而
無盡歎民公南海波斯因風到岸標榜具存儀刑不
遠嗚呼可以思矣蓋禪如春也文字則花也春在於
花全花是春花在於春全春是花而曰禪與文字有
二乎哉故德山臨濟棒喝交馳未嘗非文字也清涼
天台踰經造論未嘗非禪也而曰禪與文字有二乎
哉逮於晚近更相咲而更相非嚴於水火矣宋叔音
尊者憂之因名其所著曰文字禪夫齊秦構難而按
以周天子之命令遂投戈臥鼓而順於大化則文字
禪之爲也蓋此老子向春臺擷衆芳諦知春花之際
無地寄眼故橫心所見橫口所言關千紅萬紫於三
寸枯管之下於此把住水泄不通卽於此放行波瀾
浩渺乃至逗物而吟達緣而咏竝人編中夫何所謂
禪與文字者夫是之謂文字禪而禪與文字有二乎

哉噫此一枝花自瞿曇拈後數千餘年擲在糞掃堆
頭而寂音再一拈似卽今流布疎影撩人暗香浮鼻
其誰爲破顏者

明萬曆丁酉八月望日釋達觀撰

石門文字禪目錄

卷一之八

古詩

卷九

排律 五言律詩

卷十之十三

七言律詩

卷十四

五言絕句 六言絕句

卷十五之十六

七言絕句

卷十七

偶

卷十八之十九

贊

卷二十

銘 詞 賦

卷二十一之二十四

記 序 記語

卷二十五之二十六

題

卷二十七

跋

卷二十八

疏

卷二十九

書 塔 銘

卷三十

行狀 傳 祭文

目錄

石門文字禪卷第一

宋江西筠溪石門寺沙門釋德洪覺範著

門人覺慈編錄 西眉東巖旌善堂校

古詩

謁狄梁公廟

九江浪粘天氣勢必東下萬山勒回之到此竟傾瀉
如公廷諍時一快那顧藉君看洗日光正色甚閒暇
使唐不敢周誰復如公者古祠蒼煙根碧草上屋瓦
我來春雨餘瞻歎香火罷一讀老范碑頓塵看奔馬
斯文如貫珠字字光照夜整帆更遲留風正不忍掛
謁蔡州顏魯公祠堂

開元天寶政多暇孽臣姦驕濁清化尺八橫吹入醉
鄉國柄倒持與人把漁陽番將易漢官在廷之臣無
諫者 錦光照眼更覺寬寰韻和雅叛書夜到
華清宮狩呂骨驚天子訝二十四城陷同日長嗟乃
爾忠臣寡關傳平原城壁堅穴鼻可以牯牛馬譬如
灩預屹中流江勢遠來波倒射吾知守職事主耳行
藏初不較用捨公時風安入睿想貫日精誠震天下
我行上蔡黃犬門驚風急雪吹平野矯矯暮集村不
囉古祠窈窕連桑柘聖朝亦旌異代忠軒然眉鬚入

圖畫和如戲泚盧杞題儼若夢今希烈伯至今提奉
透爪地想見怒詞猶慢罵聲光自與日月爭事之成
敗其天也此詩我欲掃東壁入字端宜壁窠寫便覺
雲收六合陰春隨喜色生晴野

同彭淵才謁陶淵明祠讀崔鑒碑

武王既伐紂乃不立微子雖有去惡仁終失存商義
夷齊不肯臣甘作首陽死下視莽操輩欺孤奪幼稚
汗面亦戴天特猴而冠耳桓公弄兵權劉裕竊神器
先生於此時抽身良有以袖手歸去來詩眼飽山翠
追還聖之清太虛絕塵滓長恨千載心斷絃掩流水
崔子果何人賞音乃知此與君讀此碑相視一笑喜
題李愬盡像

淮陰北面師廣武其氣豈止吞項羽君得李祐不肯
誅便知元濟在掌股羊公德化行惇夫卧鼓不戰良
驕吳公方沈驚諸將底又咲元濟無頭顧雪中行師
等兒戲夜取蔡州藏袖裏遠人信宿猶未知大類西
平擊朱泚錦袍玉帶仍父風柱頤長劒大梁公君看
韃靼見丞相此意與天相始終

同景莊游浯溪讀中興碑

上皇御天功最盛生民溫飽卧安枕醉凭艷姬一咲

適薄夫議之無乃甚長安遮天胡騎塵潼關戰血深
沒人哥舒臣賊不足惜要爾國忠如膾鱗蒼黃去國
食不暇馬覓賜死謝天下反身罪已成湯心奈何猶
有議之者取非其子又遽忽靈武君臣無作容何須
嗚咽讓交服自控歸鞍八尺龍誰磨石壁湘江上楷
拭雲煙滅驚浪龍蛇飛動忠義詞顏元色莊儼相向
與君來游秋滿眼閒行古寺西風晚道人興廢了不
知但見游人來讀碑

陳氏賁時軒

春風著萬物粉飾相明鮮雪霜摧壓之无情如世權
問誰不可犯揖此蒼王椽斫頭未易屈槍地猶傲然
相逢獨零中秀色披晴煙陳侯我輩人逸氣傾群賢
開軒冷相向酬酢忘歲年我來作風聽夜雨雜山泉
携被願假宿與子對牀眠

洞山祖超然生辰

希郎真吾道門友初見忘年今耐久天機深穩道骨
清詩句誰令愕人口可憐佳處未全知但見茲篇氣
渾厚我生癡魯人所棄洞視胷中了無有但忻所至
有青山依倚叢林遮百醜君才一籌勝却我胡爲包
腰反隨後人生嗜好調自殊海上舊聞人逐臭江南

長憶好雲泉今日雲泉長入手萬頃蒼然几桮間作
詩舉以爲君壽理毫聊爲試冰華小字明牕看揮肘
懷慧廓然

蕭蕭暑雨過空山成夜晴月出東南峯娟娟風露清
飛螢自開合寒蟬亦悲鳴興來忽獨往聽此落礫聲
永懷西湖上絕景玉壺明松際儵然姿振策自經行
即欲呼就語忽隔千里程何時徑尋子夜航過臨平
呼棹何足道摩雲亦虛名未若擇法眼能識廓然兄
應知像教末大法欲敬傾談笑復一出要使萬世驚
燈火作朝夕已有相似情願隨人天會仰看辯縱橫

同超然無塵飯栢林寺分題得栢字

沙村宿雨餘炊烟淡寒色山墟蠶市休野飯漁舟隔
忽逢柳際門知有道人宅扣扉山答響童子出迎客
空庭竟何有凍死千歲栢鐘鳴食時至老僧揖就席
香旂定宿春露葵應曉摘羌飢一飯美何啻萬錢直
風軒納山翠引手捫石壁愛此玉崔嵬歲久自崩折
下有涸渴泉甘涼冰齒頰勿輕一脈微去漲萬頃澤
吾行無疾徐佳佳去亦得欲收有聲畫絕景爲摹刻
興來勿復緩轉顧成陳迹

次韻超然游南塔

遷塔不忍去新涼生早秋不見江西月一水空悠悠
龕燈耿畫影遺像青雙眸永懷皇祐間曾此狎沙鷗
往事已陳述豐碣撐高樓公昔從吾祖來往亦風流
但餘松菊在井曰遺林丘高風不可攀落日令人愁
倚杖哦清詩溪風波白頭脉脉不能語歸心浩難收
今已不如古無復相綢繆何當効船子華亭從釣舟

大雪戲招耶溪先生鄒元佐

昨夜顛風吹裂石曉來雪片大如席耶溪先生醉不
知擁絮雷震喧鼻息癡奴搥門呼不應但聞含糊語
呵叱先生行世如行川虛舟觸人無怨言逢人覓錢
即沽酒得錢不謝猶傲然我欲看君墮憤醉便覺兩
頰微渦旋欸段自能馱醉起歸路逆風吹凍耳入門
兒女啼飢寒瞪目矐然作直視

送英老兼簡鈍夫

靈源道價壓四海骨相正似陳睦州去年龍山同坐
夏時君亦來從我游闊傳詩膽抵身大時吐佳句凌
湯休故山歸去恰千里璽足過我不肯留行看海上
荔子熟落枝丹顆無人收應共鈍夫行樹下未輪分
柿獨風流

次韻龔德顏柳帖

顏柳以字名畫畫法可究後世何寂寥此輩了無有
皆云學未至妙不應心手那知斯人徒德高名往就
字工德不修名與身俱朽吾子佳少年俊氣駒方驟
新詩作行草開軸龍蛇走坐客口爲愕我亦知肯首
積墨如陂池積筆高隴阜學之不至顏要亦終至柳
此詩聞東坡請君書座右

神駒行

沙丘牝黃馬已死俗馬千年不能嗣忽生此馬世上
行神駿直是沙丘子紫餼爭光夾鏡眸轉顧略前批
竹耳雪蹄卓立尾蕭梢天骨權奇生已侶綠綵絡頭
沫流背繡帕搭鞍初結尾夾驟意態欲騰驤奔逸長
鳴抹千里

桐川王野夫相訪洞山既去作此兼簡直夫

野夫加於人一等玉骨春容含秀整已驚詞源倒三
峽會看聲名重九鼎江南盡處山作堆雨餘青碧數
峯開那知萬壑千巖處風帽寒驢能獨來鳳凰驚鶩
未入眼今識鷓鴣猶猶恨晚與聞掉頭不肯留出門去
袂聊一挽君家富貴若騎虎擁鼻未免非虛語何當
解帶食太倉時時携被宿玉堂

贈范伯履承奉二子

大范風月湖小范煙雨柳清明與秀微風度隨付受
醉闌看落筆已覺風助肘聲名定追尋公卿在懷袖
江湖方縱浪第未一唾手乃公幹國器議論在人口
謫居長閉門藥方曾校否著書亦細事用舍付杯酒
君看兩園鳩雨晴定呼舊

贈汪十四

石麒麟見天上物英姿秀微氣超忽我非寶公亦識
君嘉期半千知一出五色毫端欲飛動萬卷胸中正
撐突會當談笑取卿相先看唾手斫月窟詞鋒堂堂
無筆陣人笑我頑取纓紱昨日賡酌一百篇遶紙風
雷出倉卒我詩拙惡未全貧君語定知窮到骨朝來
爽氣西山高倚杖風流如柱笏祗恐與君汗漫游共
跨長鯨過溟渤

贈蔡儒効

我家與君鄰屋居君昔未生先長我君髮齊眉我總
角竹居讀書供日課君誦盤庚如注瓶我讀孝經如
轉磨長老奇君王佐才拭目願願觀長大十三環坐
同賦詩出語已能驚怯儒風雷遶紙成千篇棄遺不
惜如零唾神思義表文融明清絕如珠不受泥江左
相傳紙價增東坡一讀不復和懷高識遠不可屈功

戎回首破甕墮家貧口衆難自安出圖斗粟充飢餓
開闢筆陣掃萬人上國英雄膽先破殿前作賦聲摩
空盛名四海爭掀播華裾如惹馬如龍九衢突若流
星過我經憂患早衰微生怕虛名招實禍方衣童首
住江村飽飯愛尋閒處卧睡餘信手摸書看會意起
來行復坐林泉成趣亦題詩年來藁帙成堆垛仙郎
開卷面發光誇我雄詞驚李賀相期他日同此遊先
買鄰庵山數朶青松白石聞此言共作廬山二十箇

豆粥

出碓新秬明玉粒落叢小豆楓葉赤井花洗秬勿去
其沙瓶煮豆須粥日五更鍋面漚起滅秋沼隆陸疎
雨集急除烈焰看徐攪豆才亦趁涸渴入須臾大杓
傳淨甕浪寒不與色如栗食餘偏稱地爐眠白灰紅
火光濛密金谷賓朋怪咄嗟葦葦君臣相記憶我今
萬事不知佗但覺銅瓶蚯蚓泣

十二月十六日發雙林登塔頭曉至寶峯寺見

重重繪出庵主讀善財徧參五十三頌作此

兼簡堂頭

十年懷石門今日石門去雙林動曦光跋河開宿霧
力微藉古藤泥軟脫芒屨風泉白雲壑夜雨青松路

我生百事廢齒髮行衰莫但餘愛山心不逐年華故
此山甲天下自昔家吾祖峯如青蓮花千葉曉方吐
煙雲浮香色清涼洗肝腑異哉萬木間白塔巋然古
此老無恙時超放殊媚嫵萬象供談笑大千爲戲具
我曾從之游絕塵追逸步誰云今已亡塔開全體露
永懷憑妙觀此意竟淒楚那知深林間聊與故人遇
電眸霹靂舌咳唾成妙語筆端撼江海千偈浩奔注
人間有此客自可忘百慮堂頭百衲師疑疑法王輔
君看說禪口未肯讓前古夜闌對昏燈豪邁激頑魯
相逢俱偶然此生具逆旅何當各努力業已共騎虎
詩成對軒渠一笑小天宇

留題三峯壁間

三峯稜層如削玉一派懸泉瀉寒綠平生山水性貪
婪聊與白雲相伴宿松風竹露有餘清夜伴孤月依
蒼楹神凝氣爽睡無夢不聞樓上霜鐘鳴庵頭禪翁
頭雪白麻衣草屨提筇策謂予久與世緣疎青眼逢
迎喜詩客三峯高兮溪水深造物留之無古今新生
松竹不須剪四時風露常蕭森粥罷收盂知我去殷
勤乞與題詩句山頭塵土任茫茫白雲自在來時路

華光仁老作墨梅甚妙爲賦此

雪裏梅開何草草欲問清香無處討回看水際竹叢
邊寂寞閑愁洗粧早東坡戲作有聲畫竹外一枝斜
更好但恐金瓶容易墮額黃雖妙難長保笑笑先生
獨愛竹雪壁風梢麝媒掃應爲冰姿不可傳醉裏相
忘亦顛倒慚愧高人筆下春解使孤芳長不老從來
病眼錯黃昏隔霧相看更相惱

仁老以墨梅遠景見寄作此謝之二首

荒寒掃橫斜稀疎開未徧煙昏雨毛空標格終微見
吳姬風鬢亂睡色餘妬面誰令種性香風味極不淺
道人三昧力幻出隨意現塞管玉纖寒無勞寫哀愁
○數筆何處山領略分樹石遠含千里姿間見復層
出我本箇中人慣卧蒼崖側借路行人間勃土相欺
得那知一幅中見此晚秋色悠然欲歸去遠愁誰同
陟菊人笑絕纓捲卷成陳迹

上巳日有懷昔從雲庵老人此日山行

今年上巳日久客望江南雙林接脩水石路入煙嵐
千峯出雲雨空谷吞寒潭蒼杉鬱重童秀色動雲庵
不見庵中人青燈耿塵龕空餘行樂處攀翻聞笑談
風光與節物觸愁味參參臨高望煙靄哀涕落春衫

次韻胡民望小蟲墮耳

先生素坦率元日慵拜賀獨從耶溪翁掩門作清坐
一尊對喧譁酒酣巾幘墮忘形到挽鬚困倒相枕卧
一蟲輒墮耳忽覺風雨過隆隆竟不已亟起呼燈火
頗疑含沙流射影陰中禍蟲亦意墮井咨嗟恨坎壈
豈曰無意出欲出但未果驚憂發清詩怨語終婀娜
夫子英偉姿奇韻出羈鎖那知乘一醉遭此微物挫
闔閭眞鬪牛此事古亦夥置之勿復疑自可平物我
我詩無好句聊復相唱和恐亦有佳處一笑千愁破

贈歐陽生善相

薛公永尚敝飢腸轉鳴雷天子征遼東細君笑臙開

吾夫雖奇蹇

一本作吾夫流落徒

要是高世材發必藉時耳今

豈其時哉往見張將軍喜曰眞吾儕三矢定天山英
聲馳九坡房杜未肉食席門蒙積埃但餘王氏子文
字相追陪賢哉太夫人智鑑照襟懷嘗自撫其子國
鼎具鹽梅但未識其友試與俱而來窺窺見之喜坐
使羅尊壘果見貞觀間相逐登三台予嘗閱舊史至
此嘗徘徊數子初未貴踴躍蒿與萊而彼一女子底
蘊遺窺猜何知妻師德碩大非栽培譬之萬頃波但
見琉璃堆倔強如梁公包撫等嬰孩掩卷發長想歸
否爲崩頽吾今著田禾百念如冷灰功名一破甌掉

臂首不同頗怪歐陽生諛語坐差排人生如逆旅歲
月苦逼催懸知賢與愚終作土一坏美惡何足道君
亦眞恢諧愚賢君勿取吾肯罪形骸不肖君謂賢是
適爲吾咍重輕實在子意子定癡猷所喜亦清散時
時過茅齋明日念當行引紙研松煤詩成極醇醲蒲
萄初撥醅

贈許邦基

邦基今年方十九美如濯濯春月柳龍章鳳姿絕世
無金馬玉堂如故有酒闌愛捉玉麈尾玉色正同批
語手高燒銀燭擁新粧看君落筆龍蛇走欲驅清景
入秀句萬象奔趨不敢後人疑錦繡纏肺腸不然筆
端應有口謫仙風流今復見況亦彷彿外塵垢但恐
功名纏縛人未放青山掛窓牖

送正上人歸黃龍

道人泉南來音姿頗純美觀其略笑語亦自飽風味
相看坐終日孤月墮止水但見篆畦間青煙行未已
朝來忽去我秋風動衣袂試問安所之笑指千峯裏
秋晚當相尋結伴入層翠

贈吳世承

吳郎氣高明溫然見標格文章當世家風流走上國

清談落玉塵醉袖餘詩墨一種富貴韻綠髮映坐客
便覺儒生寒枯衰酸凍色解來古招提爐香伴禪寂
宗之果瀟灑壁門應夜直歲晏或來歸共理登山屐
次韻寄吳家兄弟

朱門連屬南昌郡東湖褒賢拔高峻西山卷簾入欄
楯富貴遮人不容進我初見之不敢瞬吳家諸郎特
風韻戲語嘲之終不愠筆鋒落處風雷起冰華百指
一揮盡紅粧聚看眼波俊一堂喧闐客懽甚大厦吞
風簷月近君看渥洼本龍孕俗馬那能著神駿

香坡懷吳氏伯仲

西山遭霧雨形勝久抑鬱雲開誰使令千峯爲子出
骨瑛淡如秋談笑極強偃扶提登高閣慷慨問陳迹
特欣曩顯醉不受澄觀律加額想諸郎豪氣洗寒乞
新莊花成輪春生夢蝶室清境乃不游萬壑同稱屈
洪崖清不殺笑傲時出沒路逢騎雪精挾以兩橘果
大雪晚睡夢李德修挿瓊花一枝與語甚久既

覺作此詩時在洞山

窮年踏黃塵旅計每自鄙此山頗岑寂飲食亦清美
瘦藤當一折且作終老計曉堂看春雪秀色淨窻几
爐暖倚蒲團頽然成坐睡君從何所來會我清夢裏

瓊花斜裊帽睂子湛秋水伊予維懽笑磨阿竟何事
忽然長揖去驚覺在千里人生孰非夢安有昏旦異
心知目所見歷歷皆虛僞他日或相逢何殊開曉寐
此詩當見渠一展笑相視

汪履道家觀所蓄煙雨蘆鴈圖

西湖漠漠生煙雨浦浦圓沙鳬鴈聚今日高堂素壁
間忽見西湖最西浦翩翩兩鴈方欲下數隻飄然掠
波去獨餘一隻方穩眠有夢不成亦驚顧蕭蕭碧蘆
秋葉赤青沙白石紛無數我本江湖不繫舟爾輩況
亦江湖侶令人便欲尋春郎呼船深入龍山塢

蘇子平汪履道試李潘墨

南陽國師古禪伯玉殿以棋聊戲客客雖四海英絕
倫我解兩奩俱用黑侍臣大驚帝微笑客亦袖手吁
莫測黑中優劣自能分正似蘇汪今試墨老潘氣韻
凌阿寬二李不平有矜色坐令好事旁舍郎瞠視無
言受巾幘我非南陽不能辨以手捫頭空嘆息徑當
相攜詣瞽叟夜半一辨須明白

隆上人歸省觀留龍山爲予寫起信論作此謝

之

芙蓉阿隆耽兩耳急性天然緩如葦懷親徑歸不肯

留少留龍山今月矣新交未數故人稀睡足明窓臨
葉几管城落帽爲微笑便覺金光走龍尾試校驚經
拂硬黃傳此寶書千餘紙紙光葉葉揭筠膜字工戰
戟行凍螳勝公昔讀龍宮文百本妙談此其髓流落
人間今幾年此去西天十萬里我寄開房古寺中間
風著穗自當止自非道人三昧力此書何以能至此
炷香一讀萬緣空海印發光初按指願君垢盡難出
燁亦於此法信根起生生要續無盡燈照了無明癡
種子

送元上人還桂陽建轉輪藏

趙州飽叢林懶憶亦慣便起步作欠伸藏經終一遍
投子猶可駭手足未舒展但於數字中演出五千卷
兩翁古禪伯措置令人羨安知塵塵中法輪常自轉
無數妙章句函匱金碧眩芥子琉璃瓶歷亂齊發現
頗怪老龍華底事別營建幻出諸鬼物奇狀分百變
疾馳並推較過目等飛電萬衆初錯愕熟視生悲戀
譬如觀寫照筆下出眉面爭貴紙上容活者反棄賤
乃知像教末妙理蔽浮淺要令齒髮輩種性受熏煉
元禪今南歸酬此風所願我作送行詩敗墨磨破硯
詩成一大笑相顧春風軟會看出談笑錯落照深殿

想見午梵清隨喜時遶旋

贈淨上人

金華上人牧羊伴來尋江南好山看西湖毛骨漱秋
光野鶴精神照冰段嗟余塵事苦相羈橋項蒼顏老
路岐二年來往南州浦古寺閒行三見之生涯初不
受塵垢到客踟躕聽秋雨玉軸已閒經半掩銀葉未
寒煙一縷雲泉佳處包當解未暇從人覓錢買不嫌
高笑常垢汙與子俱載歸東吳

贈器之禪師

器禪鄱水來一鉢自笑傲偶然家此山十見青林槁
寒骨聳詩律枯筆作行草韻如絳闕容日月不能老
伊余曾聞名再見遂傾倒情高付無求語妙知有道
茲山得君居便覺山愈好何時卜東巖隣徑雲共掃
時時從君游吐詞覓遺藁

秀上人出示器之詩

川原積雨收餘陰閣新晴一宿古蘭若歸夢有餘清
清辰起危坐笑看煙縷橫讀此阿師詩秀綵出盆明
中有衆谷髓氣和李騎鯨通知落筆處遶紙風雷生
世無歐陽公意氣相倒傾豈當棄置此終老黃茆坑
雲居道疑大上藍持簡精藉渠一笑起頽網相拄撐

秀也舊不識一見氣不矜索詩亦不惡爲此抑鬱情
持以示流輩試令俗眼驚

送雷從龍見宣守 并序

韓子蒼少時從雷從龍先生游子蒼已入館而從
龍尚高卧廬山之下六喪未葬特詣宣城謁知府
舍人劉公褒公褒僉判在府中作此詩送之

子蒼布衣昨日脫今日便校秘閣書勿驚韓雷相隱
顯今來古孫名姓俱君看守道已華國先生徂徠猶
把鉏嗟君六喪寄空館富人滿前那可揀壞衣懸鷄
無一錢想像郭公四十萬青雲故人氣如春解今寒
谷生和珍江浦買舟春水生片帆何日到宣城府中
若見空青老從渠爲覓詩遺藁

予在龍安木蛇庵除夕微雪及辰未消作詩記
之 二首

終夕不自寐老逐客愁長寒威正折綿歸夢不成往
蕭聲聞打窻氣勢頗春撞地爐對殘缸瓦溝集清響
起看雪覆砌秀色動屏帳歸來簷溜滴生席初未暖
乃知春草微已出嚴凝上但餘簷菊林落花和月賞
元朝喜見雪一室譚少長新年方下車故歲已長往
和詩如奕棋時時作頭撞知誰徑尋我東牆侵齒響

正當穩靠蒲移几就紙帳宿硯已生冰呵筆藉和暖
一片忽飛來墮我詩卷上爲置石鼎烹茗飲聊同賞

龍安送宗上人游東吳

淮水送君春雨餘刺舟斷岸歸匡廬江南別我秋天
遠輕囊瘦策游西湖君去復來如社燕我獨留滯如
賈胡牽衣覓詩亦不惡怪君見戲忘髭須平生千偈
風雨快約束萬象如驅奴飢來一字不堪煮乃知弄
筆輪耕鋤不如尋我舊游處武林清境天下無耐清
不得却來此作詩送君游上都

送充上人謁南山源禪師

老源縛屋磯山側廬山對門江水隔單丁住山二十
年一等栽田博飯喫諸方說禪如紡車我口鈍邊無
氣力屋頭枯木自安禪生鐵香梁釘椿直我昔東游
曾見之兩頰溫然笑渴出到今持夢渡楊瀾浪花漫
天浩無極紛紛衲子飽眠卧面如梔子衣領白年年
江北與江南誰肯端來尋此客愛君今人肺腸古毛
骨含秋眼睛碧能知此老端往尋處處好山留不得
作詩贈君終自愧君去我留空歎惜

石門文字禪卷第一

補註 師中金壇子王立施刻此卷了錄居士對
徐普書端學究刻 萬曆丁酉仲秋徑山寺識

石門文字禪卷第二

宋江西筠溪石門寺沙門釋德洪覺範著

門人覺慈編錄 西眉東巖旌善堂校

古詩

高安會諒師出諸公所惠詩求予爲賦用祖原

韻

黃塵踏遍江南岸，嬌首無言對河漢。故山有屋埋深雲，一夜歸心掣不斷。山舟日夜去無休，挽繩欲繫繫無由。紛紛世態真一夢，顧我所爲如直鉤。綠錦江頭識諒禪，傾坐高談象帝先。疑君即是僧太白，不然無乃真彌天。仙風襲人欲輕舉，天容道氣出眉宇。擁坐衣裳墮不收，山水懷雲輕百補。我今老倦亦慵參，去死正如三眠鷺。相看一笑有佳約，他日同歸五老庵。人生真若屈伸肘，萍浮梗泛因邂逅。料君有膽大於身，未應搜索因詩瘦。閒亭夏木初垂陰，相逢還得同携手。未見千首萬丈光，先看七步才八斗。

次韻汪履道

老來漸覺朋儕少，夜室孤禪還自照。惟詩垢習未全除，賴有汪郎恰同調。嘗聞從來以類從，谷風忽作虎應嘯。交道今嗟張紙薄，老人嘗與少年約。與君一笑

似三秋，此道長令洞開廓。

次韻李商老匡山道中望天池

幽人修水上，春漲冒陂田。時時想見之，笑頰微渦旋。往來柴桑間，妙語生雲煙。廬山自高寒，青碧開晴天。倚藤望絕頂，風味如斜川。我思從之游，子亦當勉旃。詩成聊假寐，歸夢歷層巔。

至豐家市讀商老詩次韻

楊柳護橋春欲暗，山茶出屋人未知。冒田決決走流水，小夫錐脰翁夾籬。雪晴春巷生青草，煙濕人家營晚炊。心疑輞川摩詰畫，目誦匡山商老詩。夜投村店想清境，蛙滿四隣。簷月移，卧看孤燈心耿耿。呼童覓紙聊記之。

送子美友

曉痕翠浪行將遍，掠面柔風初剪剪。梅頰欺寒底死，香柳眼窺煙皺未展。相看感此故意長，欲別忍看春尚淺。離情惱人深，造次撩我小詩弄。清婉腸斷江頭無語中，謝郎匹馬嘶風遠。

謝安道花壇

三月江南春不淺，謝家池上開花苑。層壇迸破碧瑤瑤，嫩蘂簇成紅婉婉。一花兩枝和霧白，素娥月下逢

姑射十朵五朵照水紅仙姝並立瑤池東人生遇景
須行樂莫使餘香散簾幕白雪難逃鬢上斑金樽且
對花前酌醉則傲羲軒醒則歌堯舜榮辱是非都莫
問風雲際會自有時忠義果然天不困君今還作天
涯客竟闌正遇羣芳拆不挿羣英醉上林人謂少年
真可惜明年再獻平戎策順風高舉摩天翼大手親
提却日戈刈除天下閒荆棘古人養花如養賢我今
說花心亦然栽培直欲助真宰扶持造化工陶甄時
人莫以花爲浼大都自是人情改若使人情長似花
相看顏色年年在謝安道輩真難得不容蒿艾生墻
側不勞巧手寫丹青不學世人畫墻壁靈苗自有天
然格門外溪光長瀉碧更向溪光種碧桃宛然便是
神仙宅謝家池館勝瑤臺淺白深紅次第開爲報賞
花君子道何須東海覓蓬萊

送覺海大師還廬陵省親

老蹤滄海珠道價壓千古莫年還東吳豈不以親故
世衰道陵夷學者例頑魯處處如塵沙紛然不容數
但誇謝公子乃翁墮江渚坐令乳臭兒高論不少懼
安知覆漁舟甚媿編蒲履大師京國來秀色見眉宇
笑談出流輩亦自有佳處懷親不能休飲食忘匙箸

醉翁鄉里賢安角誦翁語人老尚康健春寒與秋暑
念之凭高樓白雲入瞻顧浩然有歸興掣肘徑馳去
遙知到螺江杜林聞布穀迎門一調笑謹極但摩拊
童頭想懷橘承樵應戲舞聊用慰其心高追古人步
此詩語散緩細讀有奇趣譬如食橄欖入口便酸苦
勿示癡道人被罵吾累汝

送喻上人歸筠乞食

蜂房蟻穴天魔宮青蓮忽生樓閣重升堂搗鼓集衲
子爭看掣電飛機鋒者年過憂食時至欲學遣化毗
耶翁瑜禪聞之笑一笑此老變怪驚兒童我當乞行
等貧富欲使勝利傳無窮出門掌鉢何所詣胡馬舊
聞嘶北風霜清月冷動歸思已覺荷山生眼中會看
對衆捧瓊瑤平等心華含太空

仇彦和佐邑崇仁有白蓮雙葩並幹芝草叢生

於縣齋之旁作堂名曰瑞應且求詩敬爲賦
之

宰肉杜樹陰豈無天下志用材櫟樸間已有經綸意
欲觀臨大事必自小者耳彭侯偉傑姿要是千乘器
小邑試牛刀不滿一咲喟仇亦何所爲睡足時隱几
原多深夜耕門有晝眠吏三年愛等毋百里平如水

政化不自知草木發奇瑞論人或多舛唯天不容僞
耿泉豈知忠元乳豈知義應之捷影響物有固然理
此堂濕青紅賓從時畢至應爲文字飲硯席生佳氣
吏民起獻觴願酬太平醉

華裾翠

居上人自雲居來訪白蓮社話明日告歸作此

送之

浮雲山盡際花木迎春暉佳八殊方來見之消渴飢
藉草坐松影粉香時落永氣貌秀可掬出語超幽微
巖壁鐘聲寂山陰花發稀去袂挽莫留又作旣峯歸

次韻汪履道

君去中秋猶一缺爽氣洗開倍明徹昨夜宵晴獨倚
欄露冷鳴廊卷風葉百年客舍熟黃梁夢境偶逢還
偶別擁鼻公豈免百年死灰我何說故國天涯
眼力衰飛鳥當還倦始知可憐此別秋方壯未審重
來是幾時

予與故人別因得寄詩三十韻走筆答之

天不逸羣君獨立洞徹心胷秋色入於中堆積萬卷
餘筆力至處風雷集刃游理窟無全牛端與腐儒到
固執昔年囊絛露微銛已陟雲梯最高級縱令大醉

賦凌雲玄珠閉眼從頭拾森張秀骨具神駒顧盼絕
塵那可繫亦是個中流恨不識君只依他西園
道人工文章覽詩愧歎不復習野僧頑鈍誰比數而
得聽君論軻伋別來三月鄙吝萌聞傳習新詩什
翻瀾妙語驚倒人氣餒霜鋒光熠熠此詩初得喜未
展烏鳴下啄雞得粒初如積水窺落霞淺碧穠紅相
間緝又如霜曉聽邊風十萬軍聲何禽禽筆鋒正銳
物象貧降旌狼藉詩魔泣欽欽太白不得儔侶強退
之自莫及蠅頭細字好生書爲君卷束藏幽笈嗟予
衰老百無能園圃自鋤瓶自汲人間萬事一笑空流
年忽忽將三十形骸念念非昔人暗中負去何其急
竭來寒剝猶可晒兩眼欲昏愁淚濕擎圭專作口腹
謀骨立侯門聽與給舊山歸去成蹉跎半年飄泊留
城邑詩源荒涸如廢池淺穴敗隄微有濕不量更擬
和陽春枯木鑽膏竹瀝汁夜樓無語立西風月華如
水清堪挹君居若耶溪水東我舍秋河半山隔露冷
亦應思故人篋有緹衣餘十襲碧光當戶應可掬頑
翠撐天空葉及檠須落日意無窮片片催詩暮雲歛
知君今作蟠泥翁頭角那能久埋跼妙齡素有廊廟
具破袞煩君重補緝我亦東西南北人從今預可措

杖笠早晚風雲際會時雷震一聲龍起蜃

蒲元亨畫四時扇圖

畫工妙物無不可誰能筆端自忘我醉蒲睡著呼不聞但見解衣礪礪贏起來漱墨滋破硯霜綃只尺開紈扇點綴四時無不有但覺眼前紅綠眩雲破連峯青碧開林梢時復見樓臺斷橋落日空流水爲問秦人安在哉春山杳靄知何處夏木森森蔽雲雨秋陰未破雪滿山笑指千峯欲歸去看山對客憶蛾眉客去愁多自不知滿眼匡廬看畫軸平生坐視虎頭癡萬事浮雲定何有白鶴歸來千載後江山長在身世忙歲月不移舟壑走對此未歸心欲折借君玉斧修圓月會看談笑滿清風詎使人間畏炎熱

贈閻資欽

名都大藩地英俊蔚如林烏靴青衫中時見閻資欽風度若英特杳然自清深借無軒冕意功名亦相尋合是廊廟具下僚那敢沉郵亭欸夜語霜清特携金篝燈伴清對商略雜古今譬如武庫開錯架森球琳詩工出奇麗寫物意在琴絕如歐陽公但欠雪滿簪句法本嚴甚頗遭韓柳侵願爲匿盆甌恥作躍爐金世無子期耳廣陵誰賞音何當學梅福九江歸雲岑

次韻見寄二首

心親出傾蓋氣合論風因久已仰高誼竊伏淮海濱夫子真自重不減南國珍笑談帶富貴翰墨生精神譬如千江月處處能分身而予續高韻坐客譏效顰安知磁石針妙處無陳新思君欲夜話痛嗟隔城闔熟讀寄來詩秀色摩清春便覺海棠兩圓吮爭滑唇游絲登百尺飛絮沾泥塵要當爲設榻數以白氈巾看君把麈尾抑氣思舊申涼肝藉苦語激烈敢不遵

次後韻

平生邁往氣醞造次公狂才高簿書縛貌和無欺傷君看此風味自是萬夫望利害方焚和唾笑皆清涼穎臯舊廬在頃稻連畝桑時以芻柱頰阻隔如澗岡少陵功名念看鏡毛髮蒼長哦和秋雨菊林更聞螢人生行樂耳萬事付一觴淮南謫天厨大言忘巽林吾儕本疎拙閱世忘否臧願言置此喙無咎持括囊桂賢供火浴龜虛得剝腸一蓑煙雨蝸兩角我耕南畝君開荒

送通上人游廬山

少年四方志一杖餘氈巾朝來過微雨扁舟買南津廬山冠天下況復當青春遙知泊星渚雲開蒼翠新